



電子輓聯

記叔公太个告别式

蒙田造筆以來，一筆一劃
用手寫了幾千年
筆係心聲，字早就會擘嘴會講話
字會噉也會笑
有時還有表情摻想法
看字就知人，有骨有義有肉有情
用手寫个字看得出心情


叔公太以前在世時節
摻人寫輓聯
楷書字正正，盡有禮貌
寫隸書，雁尾就像一支刀仔
痛心時節會割心肝
成下字草草，心就亂糟糟像野生个草
目汁在目珠窟，打幾隻圓圈跌下來
白布頂就多了一滴一滴个墨汁
還有時節佢精神起來
筆劃粗粗有力像肩頭
希望家屬愛腳踏實地堅強企起來

時代緊行緊遽咧
像會徙動个烏影遮忒一隻年代
叔公太這下做古人去咧
告别式場吹來一陣風，低碳風
看著簡單，又像忒簡單
輓聯毋用手寫毋使手掛
出山該晡日
看毋著輓聯迎風飄搖个哀傷
叔公太个神位坐在頭前

佢个頭那頂有一臺電視
全世界輓聯因在裡背，電子化生產
過身个叔公太也分時代逼去趕流行

告別式場吹來一陣風，節能風
看著簡單，又像忒簡單
毋使用手寫个輓聯沒墨沒汁
一種標楷體硬行行
傳統嘅節能忒咧
文化嘅減碳忒咧
多儕人共下用一種樣式
叔公太个一生，也係別人个一生
輓聯毋會認人
字也毋會講話
又像一封信，影印之後
寄分當多人

愛響毋響个電子紙炮霹哩啪啪
叔公太靈前个相片共樣笑微微
時代行恁遽佢追毋著
逐年跨年晚會，共樣煙火滿天
儀式一下間就變成形式
老傳統總係比毋過新潮
像又毋像个電子輓聯一幕一幕
換頁，換忒一隻世界
今日換忒昨日
今生換忒前世
今人換忒古人
電子，輓聯



作者感言

葉國居 公務員

謝謝主辦單位，近二年來，我嘗試以母語寫作，雖然未臻純熟，但踏出一步，就覺得心中踏實無比，我想我必需更認真一些，畢竟，母語的弘揚，需要更多人來共同參與。